

**ZAKON O IZMJENAMA I DOPUNAMA  
ZAKONA O REGISTRACIJI POSLOVNIH SUBJEKATA**

**U zakonu o izmjenama i dopunama Zakona o registraciji poslovnih subjekata („Službene novine Federacije BiH“, br. 27/05, 68/05 i 43/09 i \_ ), vrše se izmjene kako slijedi:**

**Član 1.**

Novi član 15 a), briše se.

**Član 2.**

Član 22. mijenja se i glasi:

Registarske isprave

(1) Za potrebe utvrđivanja i provjere općih i posebnih podataka koji se prilikom osnivanja poslovnog subjekta ili izmjena podataka od značaja za pravni promet obavezno unose u registar, u ovisnosti od predmeta upisa, registarski sud zahtijevat će podnošenje sljedećih isprava:

- (1) Ličnu kartu, putnu ispravu ili izvod iz odgovarajućeg registra kojim se utvrđuje identitet osnivača, za strano ili domaće fizičko ili pravno lice, ako se ne radi o notarski obrađenom aktu o osnivanju ili akta o izmjenama općih podataka od značenja za pravni promet, već osnovanog, odnosno registrovanog subjekta upisa, kojim se utvrđuje osnivanje, odnosno izmjena bitnih podataka, s ovjerenim potpisima pravnih lica.
- (2) Ličnu kartu, putnu ispravu ili odgovarajuću prijavu kod nadležnog organa unutrašnjih poslova kojim se utvrđuje identitet podnosioca prijave, za strano ili domaće fizičko lice, ako se ne radi o notarski obrađenom aktu o osnivanju ili akta o izmjenama općih podataka od značenja za pravni promet, već osnovanog, odnosno registrovanog subjekta upisa, kojim se utvrđuje osnivanje, odnosno izmjena bitnih podataka, s ovjerenim potpisima pravnih lica.
- (3) Ličnu kartu, putnu ispravu i odgovarajuće pisano ovlaštenje kojim se utvrđuje svojstvo lica ovlaštenog za zastupanje odnosno predstavljanje subjekta upisa i ovjereni potpis tog lica, ako se ne radi o notarski obrađenom aktu o osnivanju ili akta o izmjenama općih podataka od značenja za pravni promet, već osnovanog, odnosno registrovanog subjekta upisa, kojim se utvrđuje osnivanje, odnosno izmjena bitnih podataka, s ovjerenim potpisima pravnih lica.
- (4) ovjereni potpis lica ovlaštenog za zastupanje na obrascu prijave za registraciju predviđenom za sud u štampanom obliku;
- (5) akt o osnivanju ili akt o izmjenama općih podataka od značaja za pravni promet već osnovanog, odnosno registriranog subjekta upisa kojim se utvrđuje osnivanje, odnosno izmjena bitnih podataka;
- (6) statut poslovnoga subjekta;

- (7) odluku o imenovanju lica ovlaštenog za zastupanje u unutarnjem i vanjskotrgovinskom prometu, ako nije imenovana aktom o osnivanju;
- (8) potvrdu banke o izvršenoj uplati na privremeni račun deponovanih novčanih uloga kojom se utvrđuje visina uplaćenog kapitala u novcu;
- (9) dokaz o sredstvima osiguranja za neuplaćeni iznos novčanog dijela osnivačkog uloga kod jednočlanog društva kapitala;
- (10) dokaz o sredstvima osiguranja za neuneseni dio nenovčanoga uloga kod jednočlanog društva kapitala;

(2) Registracijski sud će po službenoj dužnosti, ako smatra da je to potrebno, pribaviti:

- 1) izvod iz odgovarajućeg javnog registra kojim se dokazuje vlasništvo nad ulogom u stvarima i pravima, odnosno prijava za odgovarajući javni registar, i nalaz ovlaštenoga sudskog vještaka kojim se utvrđuje vrijednost uloga u stvarima i pravima;
- 2) odgovarajuće odobrenje Komisije za vrijednosne papire Federacije Bosne i Hercegovine (u daljnjem tekstu: Komisija za vrijednosne papire) i Registra vrijednosnih papira Federacije Bosne i Hercegovine (u daljnjem tekstu: Registar vrijednosnih papira), ukoliko je to propisano posebnim zakonom;
- 3) odobrenje nadležnog organa u skladu sa članom 46. ovoga Zakona.

(3) Odredbe stava 1. tačke 1) ovoga člana primjenjuju se kod upisa osnivanja svih oblika privrednih društava, kao i kod upisa promjene podataka koji se tim ispravama dokazuju, osim ako je njihova primjena izričito isključena ovim Zakonom.“

### **Član 3.**

U članu 23. u stavu 1. u tački 2. Brišu se riječi: „notarski obrađen“.

U tački 3. Brišu se riječi: „notarski utvrđen“.

Tačke 4. i 5. Brišu se.

Tačke 6.7. i 8. postaju 4.5. i 6.

#### **Nakon izmjena član 23. stav 1. glasi:**

„ (1) Uz prijavu za upis osnivanja dioničkog društva pored ostalih isprava , podnose se i sljedeće isprave:

- 1) isprave propisane članom 22. Stav 1. Tačka 1.
- 2) akt o osnivanju
- 3) statut
- 4) potvrda banke o uplati osnivačkog kapitala u novcu, odnosno dokaz o novčanoj vrijednosti stvari i prava unesenih u društvo;
- 5) odluka o imenovanju lica ovlaštenog za zastupanje, ako nije imenovano aktom o osnivanju;
- 6) ovjeren potpis lica ovlaštenog za zastupanje.“

### **Član 4.**

U članu 24. u stavu 1. tačka 2. Riječi: „notarski obrađen brišu se.

U tački 3. Riječi „notarski utvrđen“ brišu se.

**Nakon izmjena član 24. stav 1. glasi:**

„(1) Uz prijavu za upis u registar osnivanja banke ili druge finansijske organizacije pored ostalih, podnose se i slijedeće isprave:

- 1) isprave propisane članom 22. stav 1. tačka 1) ovog Zakona;
- 2) akt o osnivanju banke;
- 3) statut banke;
- 4) rješenje Agencije za bankarstvo Federacije Bosne i Hercegovine (u daljnjem tekstu: Agencija za bankarstvo) o izdavanju dozvole za rad kao i saglasnost na akt o osnivanju i statut, odnosno isprave predviđene drugim zakonima Federacije;
- 5) dokaz da su uplaćena novčana sredstva na privremeni račun kod banke;
- 6) akt o imenovanju direktora ili vršioca dužnosti direktora;
- 7) ovjeren potpis lica ovlaštenog za zastupanje;
- 8) dokaz da su osnivači banke sredstva u nenovčanom obliku stavila na raspolaganje banci.“

**Član 5.**

U članu 25. stav 1. tačke 2. Riječi: „notarski obrađen brišu se.

U tački 3. Riječi „notarski utvrđen“ brišu se.

**Nakon izmjena član 25. stav 1. sada glasi:**

„(1) Uz prijavu za upis u sudski registar osnivanja dioničkog društva za osiguranje prilažu se:

- 1) isprave propisane članom 22. stav 1. tačka. 1) ovog Zakona;
- 2) akt o osnivanju banke;
- 3) statut banke;
- 4) dozvola nadležnog organa za rad društva, odnosno druge isprave propisane drugim zakonom Federacije;
- 5) akt o imenovanju direktora ili vršioca dužnosti direktora;
- 6) ovjeren potpis lica ovlaštenog za zastupanje;
- 7) dokaz o deponovanim novčanim sredstvima na privremeni račun;
- 8) dokaz o ulozima u stvarima i pravima.“

**Član 6.**

U članu 26. stav 1. tačka 2. riječi: „notarski obrađen“ briše se.

**Nakon izmjena član 26. sada glasi:**

„(1) Uz prijavu za upis u registar osnivanja društva sa ograničenom odgovornošću prilažu se sljedeće isprave:

- 1) isprave propisane članom 22. stav 1. tačka. 1) ovog Zakona;
- 2) akt o osnivanju;
- 3) potvrda banke o izvršenoj uplati kapitala u novcu odnosno dokaz o novčanoj vrijednosti stvari i prava unesenih u društvo;
- 4) odluka o imenovanju lica ovlaštenog za zastupanje ukoliko nije imenovano aktom o osnivanju;
- 5) ovjeren potpis lica ovlaštenog za zastupanje“.

## **Član 7.**

Član 27. Mijenja se i glasi:

Uz prijavu za upis u registar osnivanja društva s neograničenom solidarnom odgovornošću i komanditnog društva prilažu se sljedeće isprave:

- a. akt o osnivanju;
- b. potvrda banke o uplati novčanog uloga na privremeni račun, odnosno dokaz o tome da su stvari i prava stavljeni na raspolaganje društvu ukoliko je predviđena uplata novca, odnosno unošenje stvari i prava u društvo aktom o osnivanju;
- c. ovjeren potpis osobe ovlaštene za zastupanje.

## **Član 8.**

Član 32a. se briše.

## **Član 9.**

U članu 30. poslije riječi: „prilažu se“ i dvotačke i poslije riječi „ugovorom“ i zarezom brišu se riječi: „notarski obrađen“.

Nakon izmjena član 30. glasi:

Uz prijavu za upis u registar osnivanja poslovnog udruženja prilažu se: ugovor o osnivanju, dokaz o uplati osnovnog kapitala u novcu kao i dokaz o stavljanju stvari i prava na raspolaganje poslovnom udruženju u skladu sa ugovorom, odluka o imenovanju zastupnika poslovnog udruženja i ovjeren potpis zastupnika poslovnog udruženja.

## **Član 10.**

U članu 39. u stavovima 1. 2. 3. i 5. riječi „notarski obrađena“ brišu se, u stavu 4. prije riječi „ugovor“ i stavu 6. prije riječi „ugovor“ i „odluka“ riječi „notarski obrađen“ se brišu.

U istom članu iza stava 6. dodaje se novi stav 7. koji glasi:

„(7) Ukoliko se promjene iz ovog člana vrše izmjenama osnivačkog akta, uz prijavu za upis promjena u registar, prilaže se izmjena i/ili dopuna osnivačkog akta.“.

**Nakon izmjena član 39. glasi:**

(1) Uz prijavu za upis u registar promjene tvrtke prilaže se odluka o promjeni tvrtke.

(2) Uz prijavu za upis u registar promjene sjedišta subjekta upisa prilaže se odluka o promjeni sjedišta subjekta upisa.

(3) Uz prijavu za upis promjene djelatnosti subjekta upisa prilaže se odluka o promjeni djelatnosti i odobrenje mjerodavnoga tijela, ako je to propisano posebnim zakonom.

(4) Uz prijavu za upis u registar promjene odgovornosti subjekta upisa za obveze drugih subjekata upisa u pravnome prometu prilaže se ugovor, odnosno njegove izmjene.

(5) Uz prijavu za upis promjene osobe ovlaštene za zastupanje subjekta upisa prilaže se odluka mjerodavnoga tijela subjekta upisa kojom je jedna osoba razriješena, odnosno kojom toj osobi prestaje pravo zastupanja, a druga osoba imenovana, odnosno ovlaštena za zastupanje, kao i opseg ovlasti te osobe i ovjereni potpis te osobe.

(6) Uz prijavu za upis u registar promjene osnivača ili uvećanja odnosno smanjenja broja osnivača ili promjene osnivačkoga udjela prilaže se ugovor, odnosno odluka o promjeni osnivača odnosno udjela.

(7) Ukoliko se promjene iz ovog člana vrše izmjenama osnivačkog akta, uz prijavu za upis promjena u registar, prilaže se izmjena i/ili dopuna osnivačkog akta.

**Član 11.**

U članu 42. prije riječi „odluka skupštine“ riječi „notarska obrađena“ se brišu.

Nakon izmjena član 42. glasi:

Uz prijavu za upis novog poslovnoga subjekta nastalog podjelom prilaže se odluka skupštine o podjeli poslovnoga subjekta i diobni bilans odobren od skupštine.

**Član 12**

U članu 43. prije riječi „odluka skupštine“ riječi: „notarski obrađen“ se brišu.

**Član 13.**

Iza člana 57. dodaje se novi član 57. a), koji glasi:

„ Postupak po zahtjevu za registraciju poslovnih subjekata je hitan.

O zahtjevu za upis u registar prvostepeni sud je dužan da odluči u roku od 5 dana od dana dostavljenog kompletnog i ispravnog zakona.

Ukoliko se na prvostepeno rješenje uloži žalba, drugostepeni sud je dužan da je riješi u roku od 15 dana.“

## **O B R A Z L O Ž E N J E**

### **ZAKONA O IZMJENAMA I DOPUNAMA ZAKONA REGISTRACIJI POSLOVNIH SUBJEKATA**

#### **I- USTAVNI OSNOV ZA DONOŠENJE ZAKONA**

Ustavni osnov za donošenje ovog zakona sadržan je u odredbi člana IV. C. 3. a u vezi sa članom IV. A. 20. (1) d), Ustava Federacije Bosne i Hercegovine, kojim je propisano da pravila postupka potrebna da bi se osigurala jednakost u postupanju kao i osnovni principi pravičnosti u postupcima pred sudovima i organizaciji svih sudova bit će utvrđeni zakonima Federacije BiH. Obzirom da se ovim zakonom uređuju pravila postupka registracije poslovnih subjekata pred sudovima u Federaciji BiH navedena ustavna odredba predstavlja ustavni osnov za njegovo donošenje, pa je na osnovu člana IV. A. 20. (1) d) Ustava Federacije BiH, Parlament Federacije BiH nadležan za donošenje ovog zakona.

#### **II-RAZLOZI ZA DONOŠENJE ZAKONA**

Zakon o registraciji poslovnih subjekata u Federaciji BiH („Službene novine Federacije BiH“, br. 27/05, 68/05 i 43/09) je procesni zakon koji reguliše dio oblasti čija je implementacija direktno povezana za ostvarenjem postavljenih ciljeva Vlade Federacije BiH. Zakon je do danas pretrpio tri izmjene i dopune, a njegovom primjenom, utvrđeno je da je navedenim izmjenama postupak registracije društva u Federaciji BiH postao još komplikovaniji i skuplji, te da kao takav predstavlja prepreku potencijalnim investitorima u pokretanju poslovanja u Federaciji BiH.

Uvođenje obaveze notarske ovjere određenog broja akata, predstavlja klasičan parafiskalni namet za poslodavce. Naime materijalnim zakonom se uvede određena nadležnost za postupanje određenog organa, u ovom slučaju notara, a na osnovu toga poslodavac mora da plaća tu obavezu. U ovom slučaju, sasvim otvoreno, treba reći da je takva odredba unijeta u zakon da bi se pogodovalo notarima.

Notari imaju sve veću ulogu u osnivanju privrednih društava, prenosu udjela i statusnim promjenama u mnogim zemljama Evrope i svijeta. Vidjeti propis Savjeta Evrope (CC) br. 2157/2001 od 08.10.2001. godine o Statutu evropskog preduzeća (SE) i Direktivu 2005/56/EC Evropskog parlamenta i Savjeta od 26.10.2005. godine. Notari imaju nadležnost da vrše kontrolu zakonitosti svih radnji potrebnih za osnivanje privrednih društava i registraciju izmjena u sudskom registru, elektronski ulažu dokumente u trgovačke registre i da izdaju izvode iz tih registara. Notar stručnim znanjem, poštujući propisanu formu, obezbjeđuje sigurnost prava stranaka, koje mu se obrate za pravnu uslugu.

Naglasak je na, koje mu se obrate za pravnu uslugu, a ne da se zakonom stranke primoravaju na takvu uslugu. Ne postoji zemlja u svijetu u kojem notari u ovoj oblasti imaju ekskluzivitet u odnosu na recimo, advokate ili pravnike u poslovnim subjektima. Nije sporno da notari imaju nadležnost za postupanje u ovoj pravnoj stvari, ali je sporno ako imaju ekskluzivitet.

Konsultujući praksu susjednih i većine EU zemalja, utvrdili smo da je većinska praksa da se ne spominju notarski ovjereni dokumenti nego samo notarski ovjereni potpisi. U svim zemljama u okruženju od kojih su dvije i u EU ne postoji obaveza notarske obrade akata za registraciju poslovnih subjekata (Srbija, Hrvatska, Makedonija, Slovenija, C. Gora)

Zakoni o notarima u FBiH propisuju obavezno učešće notara u kreiranju odluka privrednih društava, koji će kasnije predstavljati osnov za registraciju novih privrednih društava, ili registraciju izvršenih izmjena kod postojećih privrednih društava kod registracionog suda. Imajući u vidu relativno visoke iznose notarskih naknada koje plaćaju privredna društva, trebalo bi pojednostaviti postupke izmjena osnivačkih akata isključivanjem obaveze notarske obrade internih akata privrednih društava iz odgovarajućih Zakona o notarima.

Vijeća Stranih investitora je također dalo preporuke (Bijele knjige 2012/2013) koje se odnose na izmijenu zakone o notarima na način da se ili briše obaveza notarske obrade akata privrednih društava, ili na notare prenese obaveza ispitivanja ispunjenosti svih uslova i postojanja dokumentacije potrebne za donošenje odluka koje obrađuju i njihovu registraciju u nadležnom registracionom sudu. U drugom slučaju, potrebno bi bilo izmijeniti i entitetske zakone o registraciji poslovnih subjekata u smislu da se ograniči funkcija registracionog suda na registraciju notarski obrađenih odluka te u skladu sa smanjenom funkcijom i odgovornostima registracionih sudova, izmijeniti i zakone o sudskim taksama sa ciljem smanjenja sudskih taksu, koje se plaćaju za registraciju notarski obrađenih odluka o osnivanju novih privrednih društava ili izmjenama kod postojećih privrednih društava.

Imajući u vidu zacrtane ciljeve Vlade Federacije BiH, te značaj postupka registracije u razvoju ekonomije i postizanju napretka i ispunjavanju zahtjeva vezanih za proces približavanja Evropskoj Uniji, Vlada Federacije BiH je opredjeljena da nastavi ulagati napore s ciljem pojednostavljenja postupaka i jačanja transparentnosti u ovoj oblasti. Akcenat se stavlja, između ostalog na poslovno okruženje pri čemu je cilj privlačenje što većeg broja investicija, kako domaćih, tako i stranih, a kojima će se podržati srednjoročni ekonomski rast.

Vlada Federacije BiH je svojim Programom rada za period 2012. – 2014. kao strateški prioritet identificirala intenziviranje privrednog razvoja, te utvrdila da će naglasak u ovom periodu biti na jačanju domaćeg tržišta i uklanjanju barijera. Između ostalog, neophodno je poduzeti snažne mjere na smanjenju administrativnih barijera i opterećenja privrednim subjektima, prije svega u oblasti registracije poslovnih subjekata.

Također važno je napomenuti da je i u Izvještaju o aftercare aktivnostima FIPA Agencije u okviru prijedloga za unaprjeđenje poslovnog okruženja i uslova za investiranje u BiH kao jedna od prepreka za investiranje navode notarske naknade. S tim u vezi u okviru ovog Izvještaja preporučuje se izmjena odredbi Zakona o registraciji privrednih subjekata FBiH koje se odnose na notarsku obradu dokumenta u omjeru koji bi doveo do reduciranja učešća notara kada je u pitanju npr. ovjera odluka o imenovanju ili razrješenju odgovornih lica za poslovnice ili isto tako odluka o osnivanju poslovnica (član 15. stav 1. tačka 3. glasi, član 22



stav 5 i 6). Također, preporučuje se izmjena odrebi koje se odnose na prisustvo notara skupštinama privrednih društava, u smislu da se izuzme obaveznost njihovog prisustva.

Kada je u pitanju Republika Srpska ovo pitanje je regulisano Zakonom o privrednim društvima u članu 444. stav 3. koji se odnose na statut i traženu ovjeru od strane notara dok odredbe koje se odnose na notarsku ovjeru odluka o imenovanju odgovornih lica za poslovnice ili osnivanje poslovnica nema predviđenih u ovom Zakonu. Također, u RS kao dodatna olakšica za dd i doo u RS Zakonu o privrednim društvima navedeno je u članu 445. da " Od dana primjene ovog zakona na novoosnovana akcionarska društva i društva sa ograničenom odgovornošću neće se primjenjivati odredba člana 69. Zakona o notarima („Službeni glasnik Republike Srpske“, br. 86/04, 2/05 i 74/05) što znatno smanjuje broj notarskih ovjera.

U ovom smislu a u cilju harmonizacije propisa bilo bi poželjno izvršiti tražene izmjene u FBiH Zakonu o registraciji privrednih subjekata. Dodatno pitanje su i notarske naknade koje predstvaljaju značajan trošak za privrednike.

### **III-OBRAZLOŽENJE POJEDINIH ZAKONSKIH RJEŠENJA**

Članom 1. briše se član 15 a. važećeg zakona koji kao novinu uvodi mogućnost osnivanja podružnice stranog društva. U postojećem Zakonu o privrednim društvima, ne postoji takav oblik organizovanja poslovnog subjekta, tako da se Zakonom o registraciji poslovnih subjekata, kao procesnim zakonom, ne može predvidjeti registracija nečega što nije sadržano u materijalnom zakonu, te zato pravno ne postoji. Tačno je da u proceduri Nacrt novog ZoPD, te da će se nakon provedene javne rasprave, vrlo skoro utvrditi tekst prijedloga ZoPD. Da li će on sadržavati takav organizacioni oblim, te u kojem će obliku Parlament FBiH usvojiti ZoPD, nakon djelovanja poslanika i delegata, u ovom trenutku niko ne zna.

Članovi 2. **3., 4., 5., 6., 7., 9., 10., 11., 12.**, mijenja se na način da se napušta koncept notarske obrade dokumenta za registraciju. Uvođenje obaveze notarske ovjere određenog broja akata, predstavlja klasičan parafiskalni namet za poslodavce. Naime materijalnim zakonom se uvede određena nadležnost za postupanje određenog organa, u ovom slučaju notara, a na osnovu toga poslodavac mora da plaća tu obavezu. U ovom slučaju, sasvim otvoreno, treba reći da je takva odredba unijeta u zakon da bi se pogodovalo notarima.

Notari imaju sve veću ulogu u osnivanju privrednih društava, prenosu udjela i statusnim promjenama u mnogim zemljama Evrope i svijeta. Vidjeti propis Savjeta Evrope (CC) br. 2157/2001 od 08.10.2001. godine o Statutu evropskog preduzeća (SE) i Direktivu 2005/56/EC Evropskog parlamenta i Savjeta od 26.10.2005. godine. Notari imaju nadležnost da vrše kontrolu zakonitosti svih radnji potrebnih za osnivanje privrednih društava i registraciju izmjena u sudskom registru, elektronski ulažu dokumente u trgovačke registre i da izdaju izvode iz tih registara. Notar stručnim znanjem, poštujući propisanu formu, obezbjeđuje sigurnost prava stranaka, koje mu se obrate za pravnu uslugu.

Naglasak je na, koje mu se obrate za pravnu uslugu, a ne da se zakonom stranke primoravaju na takvu uslugu. Ne postoji zemlja u svijetu u kojem notari u ovoj oblasti imaju ekskluzivitet u odnosu na recimo, advokate ili pravnike u poslovnim subjektima. Nije sporno da notari imaju nadležnost za postupanje u ovoj pravnoj stvari, ali je sporno ako imaju ekskluzivitet.

Konsultujući praksu susjednih i većine EU zemalja, utvrdili smo da je većinska praksa da se ne spominju notarski ovjereni dokumenti nego samo notarski ovjereni potpisi. U svim zemljama u okruženju od kojih su dvije i u EU ne postoji obaveza notarske obrade akata za registraciju poslovnih subjekata (Srbija, Hrvatska, Makedonija, Slovenija, C. Gora)

Tvrdnje da su te obaveze utvrđene u nekom drugom, materijalnom zakonu, nije dovoljno dobra argumentacija, jer se u tom slučaju radi o pravnom pleonazmu. Znači nije potrebno prepisivati odredbe iz jednog zakona u drugi, niti je to potrebno, jer se zakon svakako mora poštovati. To samo pravi problem u slučaju promjene materijalnog zakona, jer se uz njega mora mijenjati i procesni ili provedbeni zakon.

Uostalom ovo je test za sve predstavnike političkih stranaka jer je ovo najlakši i najbezbolniji način ukidanja parafiskalnog nameta, a da budžet ili vanbudžetski fondovi ne trpe štetu. Znači radi se o Win-Win kombinaciji u kojoj niko ne gubi.

**Članom 8. briše se član 32.** Kao što je i prethodno navedeno u postojećem ZoPD, ne postoji takav oblik organizovanja poslovnog subjekta, tako da se ovim zakonom ne može predvidjeti registracija nečega što pravno ne postoji.

Tačno je da u proceduri Nacrt novog ZoPDi konačni tekst nakon djelovanja poslanika i delegata u ovom trenutku niko ne zna.

Članom 9. uvodi se novi član 57a čijom primjenom bi se skratilo vrijeme registracije subjekata a što je i jedan od ciljeva Vlade FBiH i donošenja ovog zakona. Registracija privrednih društava u FBiH, traje neopravdano dugo. Prosječno vrijeme trajanja prvostepenog postupka je oko 50 dana. Zbog toga je predloženo da se postupak ubrza i pošalje pozitivan signal investitorima.

#### **IV-FINANSIJSKA SREDSTVA**

Za provedbu ovog zakona nije potrebno osigurati dodatna sredstva u Budžetu FBiH.